

Salidi sedudi Sapatu



BURAN BAHASA DAN PUSTAKA
MAKNA
LAWANGAN SARAWAK VISUAL

UNIT PENERBITAN
DEWAN BAHASA DAN PUSTAKA
CAWANGAN SARAWAK

SALIDI
seduai SAPATU



LAWRENCE SANOUN IJAU

gambar digaga
Harry Anding



DEWAN BAHASA DAN PUSTAKA
CAWANGAN SARAWAK
KEMENTERIAN PELAJARAN MALAYSIA
KUALA LUMPUR
1978

© Dewan Bahasa dan Pustaka
Cawangan Sarawak, 1978

Terubah dichelak Taun 1966
Kedua Kali dichelak Taun 1978

PERPUSTAKAAN DBP/SAR.

No. Kelas:

No. Perolehan: 11547

Tarikh: T.T.

Dichelak

Kion Ming Press Sdn. Bhd.,
Kuching.

GENTERAN

| <i>Telian</i> | <i>Daun</i> | |
|---------------------------------|-------------|----|
| Diau Kadiri | | 1 |
| Nyumpit | | 4 |
| Ngiga Api Ka Langit | | 12 |
| Munoh Antu Birah Raya | | 24 |
| Ular Nabau | | 37 |

DIAU KADIRI

DULU KALIA bisi orang dua iko diri menyadi. Nama iya ke tuai Salidi lalu iya ke biak Sapatu. Seduai nya sama lelaki. Apai seduai landik bendar ngasu jelu lalu landik nyumpit burong. Leboh seduai tu agi mit seduai suah bendar enggau apai ngiga jelu ka kampong. Seduai bulih bendar akal enggau jalai ngulih ka jelu ari seduai meda ka gaya apai seduai ngereja pengawa nya.

Leboh umor Salidi sapuloh taun lalu umor Sapatu kira lapan taun dia indai seduai parai. Mina tinggal sida tiga mapai agi begulai ngidup ka diri. Sakumbang indai seduai udah parai, dia seduai enggai tinggal apai seduai kadiri di rumah. Suah bendar sida tiga menyanak bemalam di tanah leboh ke udah bejalai jauh dalam kampong. Tang laban Salidi seduai Sapatu tu anembiak ke mereti, nya alai seduai menyadi bulih bendar penemu enggau reti bejalai dalam kampong ke nadai di uan mensia.

Kira dua taun udah indai seduai parai, dia apai seduai pan kena sakit balat. Apai seduai enda dapat ngiga utai diempa, dia seduai menyadi nurun kadiri kadalam kampong ngiga pemakai. Pemedis apai seduai makin sahari makin balat agi majak. Iya nyau enggai makai, enggai ngirup ai agi. Meda apai seduai tak majak balat sakit seduai nyau mansang tusah ati. Tusah nyangka apai seduai tak enda tau idup.

Kejang apai seduai deka ngapus ka seput diri seninjik bendar iya ulih mansut ka jako dua tiga leka ngajar seduai.

"Ni nuan Salidi enggau adi nuan Sapatu. Aku tu mati! Seduai begulai manah-manah diau enggau panggan. Anang belaya enggai ka seduai tusah. Aku nadai pesaka ditinggal ka seduai. Semina utai dikebisi aku, sumpit dua puchok ke sama besantok ka temaga. Seduai sama bempu sangkoh nya siti siko. Sangkoh nya tau bendar dikenai seduai ngidup ka diri. Iya tau nulong seduai ti maia bisi penusah besai sereta enda diadang seduai. Seduai enda tau enda rajin gawa enggai ka seduai nadai utai diempa. Seduai anang jai enggau orang bukai enggai ka orang enda bebas ka seduai," pia ko jako ajar apai seduai kejang iya parai. Udah nya apai seduai lalu ngunjor ka diri sereta lalu ngapus ka nyawa diri.

Tusah bendar meh ati seduai menyadi tu tadi tinggal apai seduai nadai agi enggau begulai. Umor Salidi kira baru manggai duabelas taun, lalu Sapatu kira baru sapuloh taun lebuh apai seduai parai. Dia meh seduai menyadi tak ngidup ka diri-nadai apai nadai indai enggau begulai di rumah di tanah. Samoa pemedis enggau pemerinsa disepi seduai iya magang. Merinsa meh seduai tu ngidup ka diri, nyadi anak patu balu nadai apai indai enggau begulai.

Nyadi rumah ke endor seduai diau nyembuah kadiri enda jauh ari kampong. Ari ulu rumah seduai

maioh bendar bukit ke besai. Jelu, ikan burong enggau macham buah kampong agi maioh bendar dia. Dia alai seduai menyadi lantang ngidup ka diri. Utai ditanam ba redas agi ga maioh baka pisang, tebu, bukau enggau ubi, nya meh ke pengidup seduai menyadi. Semina padi nadai tentu maioh laban sida enda bulih bumai taun nya.

Nyau sapemanjai taun udah nya, utai ke pemakai seduai menyadi pan mansang kurang sakurang. Padi seduai pan nyau abis lalu bakanya ga utai ditanam nyau ka abis magang. Udhah nya Salidi lalu bejako enggau adi iya Sapatu.

“Nama chara tua ngidup ka diri deh adi. Nya baka samo utai kebisi tua nyau abis magang. Tua tentu apin tau bumai,” pia ko iya.

Ninga Salidi bejako munyi nya, dia Sapatu lalu sedan-sedan nyabak, sinu ati ninga jako aka iya. Meda adi iya nyabak dia Salidi bejako baru enggau iya. “Badu nuan agi nyabak adi. Anang nuan tusah ati. Pagila tua nguji ka pengamat jako apai ke madah ka sangkoh ti ditinggal ka iya tau nulong tua maia suntok bakatu. Anang agi nyabak, pagila tua nurun begiga kadalam kampong,” pia ko Salidi.

Ninga jako Salidi munyi nya, dia baru Sapatu lalu badu agi nyabak. Moa iya pan bisi ga lantang mimit. Udhah nya seduai menyadi lalu tindok mejam ka munok mata ini, tindok jenak meh seduai menyadi, kuroh

munyi ka matak unak rutan wi. Dinga tak rauk-rauk kukok jagau manok tuntong. Dinga tak kalau-kalau nyawa wok empeliau berua di randau kubal kampong. Hari pan tawas ga teringkas siang. Panas pan meretas ga manchar terang. Seduai menyadi pan lalu mensugau ga angkat dani. Seduai pen lalu berapi. Udah tembu makai seduai pen lalu begari.

NYUMPIT

SALIDI LALU bejako enggau Sapatu: "Nuan adi enda iboh mai sumpit, lak ka mina aku aja pan nyumpit ka tua. Nuan ngema raga basong alai tua engkah burong ke ulih nyumpit," pia ko iya.

"Barang ko nuan meh aka," pia ko saut Sapatu.

Udah nya seduai lalu nurun nyumpit ka kampong. Datai seduai dalam kampong, dia seduai lama bendar berunding ngiga tunga jalai, laban seduai enda tentu ingat ka bekau jalai lama sida iya suba. Nyau kelama seduai udah bejalai nya baru tetemu ka ratan jalai lama. Seduai lalu niti jalai nya. Enda lama udah nya baru seduai bisi ninga nyawa burong richah bendar makai buah kara. Seduai lalu limpang ari batang jalai nepat ka munyi nyawa burong ke richah. Seduai lalu tepeda ka puchok kara besai bendar. Buah kara benong mansan, ngenjing ruat puchok laban buah. Burong enda nemu agi pemaioh bepakai ka buah kara,

tak nadai didinga menoa laban nyawa sida richah berebut ka buah. Samoa bansa burong bisi dia magang.

Seduai lalu bejalai begadai-gadai nyubok burong ngagai pun kara. Datai dia Salidi lalu nyimpan laja iya ngagai lubang sumpit. Udah nya lalu dikesoh ka iya. Peda laboh ga burong siko. Kesoh ka iya baru peda laboh ga siko. Dia meh tudah Sapatu enda ngetu belanda ngumpol bangkai burong. Nama agi deh pemulih seduai iya burong. Raga nyau penoh, nya baka dibinching seduai, nyau sama penoh jari kadua-dua piak seduai menyadi.

Seduai lalu mulai ka diri ka rumah. Sapatu gaga bendar pulai ngema burong ngena raga. Kira pemanah iya hari seduai menyadi pen datai ga di rumah. Seduai lalu beguai mela burong laban perut udah lapar sahari-hari nya enda merarau. Samoa ke enda abis empa lemai nya lalu disalai seduai iya ngambi ka tan ditaroh.

Tembu nya, baru seduai bejako enggau pangan diri: "Nyangka amat meh kini jako apai enggau tua suba. Nama tak mudah bendar tua bulih burong saharitu tadi. Enti tak mujor bakanya berariari jemah ila ni enda lantang tua ngidup ka diri," pia ko seduai.

Malam nya seduai menyadi jenak bendar tindok bekau udah lelak nyumpit sahari nya tadi. Pagi hari siti udah badu seduai makai dia Sapatu nanya Salidi baru. "Kati agi tua nyumpit baru saharitu aka?" pia ko iya.

MAKLUMAT SELANJUTNYA BOLEH DIDAPATI DI:

KOLEKSI BORNEO

Pusat Dokumentasi Melayu Tun Hamdan Sheikh Tahir
Dewan Bahasa dan Pustaka Cawangan Sarawak,
Jalan Tun Datuk Patinggi Haji Abdul Rahman Yaakob,
Petra Jaya,
93050 Kuching, Sarawak.

Telefon: 082 – 227 000

Faksimile: 082 – 227 088

E-mel: eborneo@dbp.gov.my

“Memelihara Warisan Memupuk Wawasan”

